

10 Januari 2013

Nasihat kepada gereja-gereja ahli National Evangelical Christian Fellowship (NECF) Malaysia tentang penggunaan "Allah" oleh orang bukan Islam

NECF Malaysia mengekalkan hak kebebasan beragama bagi semua orang selaras dengan peruntukan Perlembagaan Persekutuan. Perkara 11 menyatakan bahawa ia adalah menjadi hak setiap rakyat Malaysia untuk menganut dan mengamalkan agamanya serta mengurus hal ehwal agama mereka sendiri.

Hak untuk menganut, mengamalkan dan menguruskan hal ehwal agama kita sendiri termasuk penggunaan Alkitab, yang merupakan Kitab Suci dalam Bahasa Malaysia, bahasa kebangsaan kita, serta Alkitab dalam bahasa orang asal Sabah dan Sarawak yang juga menggunakan "Allah", baik dalam kehidupan secara umum dan pribadi termasuk dalam semua pertemuan di dalam gereja dan di rumah-rumah.

Untuk menegaskan bahawa penggunaan mana-mana perkataan dalam bahasa kebangsaan hanya untuk satu agama tertentu adalah bertentangan dengan Perlembagaan Persekutuan. Ia adalah tidak munasabah untuk satu komuniti iman untuk campur tangan dan memberitahu komuniti agama lain bagaimana mereka harus menguruskan iman dan hal ehwal agama mereka sendiri, terutama dalam menetapkan mana-mana perkataan yang boleh atau tidak boleh digunakan dalam Kitab-kitab suci mereka.

Pendirian NECF adalah seperti berikut:

- 1) Fatwa 18 Februari 2010 yang melarang "Allah" daripada digunakan oleh mana-mana orang bukan Islam di Selangor tidak mempunyai kaitan dengan orang bukan Islam kerana ia adalah fatwa yang dibuat menurut Pentadbiran Agama Islam (Negeri Selangor) Enakmen 2003 yang berhubung dengan hal-hal pentadbiran Islam. Oleh kerana Enakmen ini berhubungkait dengan orang Islam sahaja, maka fatwa yang diwartakan ini hanya terikat kepada umat Islam sahaja.
- 2) Larangan terhadap orang bukan Islam daripada menggunakan "Allah" di bawah Enakmen Agama Bukan Islam (Kawalan Penyebaran di Kalangan Islam) 1988 adalah hanya dalam konteks penyebaran agama, dan tidak meliputi hak seseorang itu untuk menganuti dan mengamalkan agamanya serta menguruskan hal ehwal kumpulan agama mereka sendiri, termasuk beribadah dan membaca Alkitab di gereja-gereja, rumah-rumah dan mana-mana tempat pertemuan umat Kristian.


3) Pernyataan MAIS adalah tidak konsisten dan tidak selaras dengan perkembangan terkini seperti:

- Penyelesaian 10-Perkara yang dijanjikan oleh Kabinet pada April 2011 untuk menyelesaikan kebuntuan atas salinan Alkitab yang diimport itu. Dalam penyelesaian ini, Kabinet telah mengiktirafkan hak-hak orang bukan Islam untuk menggunakan "Allah".
- Penghakiman Mahkamah Tinggi 31 Dis 2009 yang mengesahkan hak perlembagaan *The Herald*, akhbar mingguan Katolik, untuk menggunakan "Allah". Oleh itu, hak ini telah diiktiraf di sisi undang-undang dan masih kekal.

Baru saja bulan yang lalu Perdana Menteri memberi satu isyarat muhibah kepada umat Kristian semasa Majlis Minum Petang Natal Persekutuan Kristian Malaysia iaitu pada 25 Dis 2012, beliau memberi jaminan kepada umat Kristian bahawa mereka "tidak dilupakan" dan dia akan menjadi Perdana Menteri "untuk semua rakyat Malaysia." Adalah mengecewakan walaupun dengan jaminan seperti itu, hak umat Kristian untuk menentukan hal ehwal agama mereka sendiri masih diganggu.

Kami menggesa semua umat Kristian untuk berdoa dan bersyafaat seperti kata-kata Rasul Paulus dalam 1 Timotius 2:1-2: "Pertama-tama aku menasihatkan: Naikkanlah permohonan, doa syafaat dan ucapan syukur untuk semua orang, untuk raja-raja dan untuk semua pembesar, agar kita dapat hidup tenang dan tenteram dalam segala kesalehan dan kehormatan."

Ditandatangani,



Rev Dr Eu Hong Seng
Pengerusi
NECF Malaysia